


Poesia

Ciculu 1



Fratellu è surella  
Zitellu è zitella  
Surelle è fratelli  
Zitelle è zitelli.

## Poesie scelte natu à u tema di Cappuccinella Rossa

Capu cappuccinu

Capu cappuccinu  
Di lana è di linu  
Capu cappucciò  
O cappuccinò

Ghjuvanteramu Rocchi

O bà ghjunghji avà  
Chì u sole chì u sole  
O bà ghjunghji avà  
Chì u sole si ne và  
Sine và pè a marina  
À vedeci à dumatina  
O bà ghjunghji avà  
Chì u sole chì u sole  
O bà ghjunghji avà  
Chì u sole si ne và !

Ghjuvanteramu Rocchi

I passi persi

Passi di a mamma  
Chì passa è chì vene.  
Passi di u babbu  
Chì parte è chì ghjunghje.  
Passi di i ciucci,  
Passucci.  
Passi di i innamorati.  
Passi asgiati,  
Di mammona è di babbone,  
Passi in giru à u fucone.  
State state à sente  
U silenziu pisiu di i passi persi  
Chì passa !

Ghjuvanteramu Rocchi

Acquafiatu

Hè l'attrechju  
Un vecchju,  
Riloghju senza sfere,  
Aghjumpatu si stà  
À guardà e custere  
È u sole quallà  
Rossu rossu chì langue  
Prima di travuccà  
Pare un caghju di sangue.

Ghjuvanteramu Rocchi

Basgi

Pendini rossi  
Suchjosi basgi  
Di sole appesi à i chjarasgi !  
Pichjate, pichjate o zitelli  
A spartevili cù l'acelli.  
Pendini rossi  
Suchjosi basgi  
Di sole appesi à i chjarasgi.

Ghjuvanteramu Rocchi

Eiu, sò paulu  
Tù sei mamma  
Eddu hè babbu  
È avà dî la tù  
La toia a famiglia.

Paulu Zarzelli

Aghju un capu caponi  
Cù un paghju d'arichjoni  
Dui ochji, un nasoni  
Bucceddi è bavidoni.

Paulu Zarzelli

Fronti di sapienti  
Ochji turchini (castagnini o neri )  
Nasu di volpe  
Bocca basgina  
Baveddu trimendu  
È ghisù, ghisù, ghisù...

Paulu Zarzelli

Mì, comu eddu salta, Lavisu !  
Mì, comu eddu corri, Lavisu !  
Mì, comu eddu si lampa, Lavisu !  
Mì, chì si hè sciappatu u nasu, lavisu !

Paulu Zarzelli

A mani quandu mi pesu  
Mi lavu a faccia  
Mi puliscu i denti  
Mi pittingu i capelli  
È zzù! À ghucà!

Paulu Zarzelli

Chjara Stella, Stella Chjara  
A me puppunuccia cara  
Voli andà à spassighjà  
A ghjucà è à cantà ?  
Metti allora u cappuccinu  
Micca u rossu ma u turchinu  
Metti dinò i to guanti  
Micca i neri ma i bianchi  
È di u to mantellu ùn ti scurdà!  
Chì fora u ventu t'hà da cutrà!

Maria Antonia Salini

Eranu dui  
Eranu trè  
Chì si n'andavanu à caccia  
Eranu dui  
Eranu trè  
Chì s'eranu messi intraccia  
Eranu dui  
Eranu trè  
Appressu à una vulpaccia  
Quella nè dui nè trè  
Ùn fece di la minaccia  
I si lentò tutt'è trè  
Fenduli la doppia faccia  
Fù cusì chì i cacciadori  
Vultonu viota bisaccia.

Ghjacumu Fusina

Ghjocu :

(Cuntinueghja è inventa tù)

**Una volta ci era una capra  
Chì avia una barba,  
Longa, longa....cusì !**

Una volta, ci era un cane, chì avia e sanne longhe, longhe ...cusì !  
Una volta, ci era una volpe chì avia una coda longa, longa, longa ....cusì !  
Una volta, ci era un gattu, chì avia i mustacci longhi longhi ... cusì !  
Una volte, ci era un topu, chì avia u musu pinzutu, pinzutu ...cusì !